



● تعرف الحاج عطوة ●

- وتعرف ابراهيم عطوة ؟  
- مش واخذ بالى فى الحقيقة.  
- دا كان ابن عمه والدى على طول، وكان فتوة  
المناييف من غير مؤاخذة ولما قامت الحرب ضد الانجليز  
أيام النحاس باشا بقى يأخذ التروسىكل بتاعه ويشيل  
مدفعه على كتفه، ويخش المعسكر الانجليزى يرمى  
قنبلتين كده وقنبلتين كده، وبعدين يرش اللي يقابله  
بالمدفع، قتل بيحى ألفين انجليزى فى شهر ولما غلب  
الانجليز منه تعرف عملوا ايه من غير مؤاخذة؟ ركبوا الدبابات وهدوا  
المناييف كلها ما خلوش راجل ولا مرة ولا عيل بيرضع من غير  
مؤاخذة. لكن شوف بقى حكمة ربنا، الوحيد اللي طلع منها زى  
الشعرة م العجين هو عمك ابراهيم عطوة .  
- يا سلام دا حظه كويس قوى.  
- شوف بقى حكمة ربنا، هرب من المناييف والضرب على ودنه  
وطلع على سكة مصر، وركب عربية نقل مع جدع سواق ابن حلال لما  
شافه عرفه، وقبل ما يخش بلبيس دخلت العربية فى شجرة انقلبت  
وولعت فيها النار، ماخطوش منطق لا هو ولا السواق .  
- يا سلام .. لكل أجل كتاب .  
- اسم الله عليك، كل بنى آدم له ساعة، وممكن تقوت من النار،  
وتموت فى شبر ميه. ودايما ربك يضرب الأمثال فى عبيده زى ما حصل  
بالضبط مع على عزوز.. سمعت عنه ؟